

Pripreme za izgradnju prvog rudnika u Bosni i Hercegovini nakon trideset godina su u toku, a traju gotovo četiri godine. Međunarodna grupacija Mineco, koja u projekt rudnika olova u Olovu ulaže ukupno 10 miliona dolara, planira otvoriti 250 radnih mjesta. Početkom februara, grupacija Mineco je i službeno predala zahtjev za urbanističku dozvolu Federalnom ministarstvu prostornog uređenja. Ali, nakon dobivanja urbanističke dozvole, kako bi rudnik počeo s radom, u sljedećem periodu biće nužno ishodovati od Federalnog ministarstva energetike, rudarstva i industrije eksploatacijsku dozvolu, dozvolu za izvođenje radova prema glavnom rudarskom projektu te upotrebnudozvolu, piše Večernji list BiH. Naglašavajući činjenicu da će godišnji kapacitet eksploatacije rude biti 150 hiljada tona godišnje, direktor firme Geomet d.o.o. Ismar Šabović ističe kako je cjelokupan proces ishodovanja svih potrebnih dozvola izuzetno zahtjevan zbog činjenice da se sva potrebna dokumentacija dobiva na lokalnoj i kantonalnoj te na federalnom nivou, što umnogome usporava cijelu realizaciju ove investicije. Na nedavnom sastanku, koji je održan s federalnim ministrom energetike i rudarstva Nerminom Džindićem, dobivena je informacija kako će se administrativni zahtjevi rješavati u što kraćem mogućem roku i da će Ministarstvo pružiti svu moguću potporu. Prvi korak je već napravljen kreiranjem radne skupine za praćenje aktivnosti za realizaciju projekta otvorenja Mineco rudnika olova u Olovu. Pokretanje rudnika otvoriće četiri nedirektne mogućnosti za zapošljavanje na svakog zaposlenog u rudniku, što će u konačnici imati značajan uticaj na dugoročni razvoj lokalne zajednice u Olovu, Predstavnici Mineco rudnika olova u Olovu smatraju kako je riječ o dugotrajnoj investiciji u bh. gospodarstvu te su uvjereni kako će u svim nadležnim institucijama naići na razumijevanje kako bi dobili svu nužnu dokumentaciju i uskoro otvorili prvi novootvoreni rudnik u posljednjih 30 godina u BiH.

izvor: nezavisne.com